

Sepinien xa diamu te Efeses

?Visi iaxa tetis uvei ak?

Pol, eloheoh tei na Iesu Kristo, iaxa tetis uvei ak[☆] e hram 60 AD (hram xil tetutou ni poten na Iesu) e melele xa tete nim te xeih e taon xa mahulong te hal Rom.[☆]

?Visi iaxa tevuli uvei ak tetiamu?

Pol tetis sepinien ak teha mi Kristin xil xa lateti e taon te hal Efeses,[☆] e tekila xa Kristin xil te rute sav xil mun ti livuli. Pol teha tepol rohon tetel moletin xil te hal Efeses e 53 AD, e hoxalite te kakaoen nan xa be valu nen.[☆] Rut moletin xil te hal Efeses latesisi tangan vata vatel xil, e Pol tenamaen ni ti vengan xa di tehusil suse nan tangan vahe Serusalem, e ien ti tenavei tangan vahas melengien vahe holu e rute ak. Di, e kakaoen nan xa tehe vatol nen,[☆] Pol tetilomun ba tete visal mol-Efeses xil ak[☆] e tepispisi kuhi mi xil hram tehe tol.[☆] Di, Pol teting Timoti tangan vapol vatel Kristin xil te hal Efeses.[☆] Di, tetutou ni melele nen ak, melele xa Pol teha tangan vasa sanien tei mi hoeo xil e sias te hal Serusalem, vat xil te sias te hal Efeses latemei latesao ni Pol e taon te hal Maelitas xa tave sotin pupu ti ra taon te hal Efeses. E rute ak, latesep kor tetel Pol e latemuis vengan xa Pol tehiteni mi xil xa linapus ti mun.[☆] Ma, Pol tenatis uvei ak ti tangan vama ni neta tei xa tenamal ti. E

☆ :: Efes 1:1 ☆ :: Efes 4:1; 6:20; Pol 28:30-31 ☆ :: Efes 1:1 ☆ :: Pol 15:36-18:22 ☆ :: Pol 18:23-21:16 ☆ :: Pol 19:1-20 ☆ :: Pol 20:31 ☆ :: 1Tim 1:3 ☆ :: Pol 20:17-38

tetis uvei ak tangan vapispisi mi xil usil polien xati te Sias na Iesu Kristo. E tetisi mun tangan vassel xat xil xi lixulehi ti lisoh ixeh e neketen nae, e lixuxou kuhi xa sexien nae xil imal tevi.

?Pol tetis uvei ak veneh?

Pol ien tehei tangan vapispisi ni xa lingxatien na Hi bos mak mu - Pol tepispisi ni mi xil xa eheien hos na Hi mahulong pupu,✧ longongen hos di bit usil holesok xil xa bos pupu xa mei be nae nggo naha xa Kristo tepol ni e rin nae,✧ e minehinen te xeihen na Hi eilep pupu.✧ Pol tehiteni mun tehit, “Hi tehosei xamim tangan muleh holesok xil xa bos pupu xa xi tehit xati tangan isa ni mi ngenen xil.”✧ Texo sepinien nan, mei rakila xa Pol tenemi xa holesok xil xa Hi teling xati bos pupu.

Pol ien tehei tangan vapispisi ni xa Iesu Kristo be vatite te holesok xil xa Hi teling xati tangan vapol ni - Pol tepispisi ni xa, texo Iesu Kristo, Hi tehosei xir tangan mei rihe horamue nan xil,✧ e tepisen kila xa iling holesok nan xil vus e he Kristo e he ngan xil mun xa labisti vituei dela.✧ Texo naha xa Kristo kestang tepol ni, Hi teteh meulien e xir e tesak ni xir rameul.✧ Texo Kristo, Siu xil e ngan xil xa latave Siu ti mei labe vanut moletin tei takes.✧ E Ninin na Kristo de tine Kristin xil e di misak ni xil lapol ni sexien nae xil vus del eheien.✧

Pol ien tehei tangan vapispisi ni xa Kristin xil labe Sias na Iesu Kristo e di lapol vituei nggoni tenben tei takes - Neta sav xa Kristin

✧ :: Efes 1:7; 2:7 ✧ :: Efes 3:8 ✧ :: Efes 3:16 ✧ :: Efes 1:18
 ✧ :: Efes 1:4-5 ✧ :: Efes 1:10-11 ✧ :: Efes 2:5-10 ✧ :: Efes 2:16 ✧ :: Efes 3:16-17

xil langgo rute savsav xil, di lasepin ni sepinien tesav xil, e sexien nae xil misav, Kristin xil labe vanut moletin tei takes✧ vengan xa Ninin Eo nae tei takes✧ e neketen nae tei takes.✧ E Ninin Eo di misa sanien mi Kristin xil vus te sias tangan vatutou ni Kristin sav xil mei lixeih mu e neketen nae tangan mei lixoni Kristo tang.✧

Pol ien tehei tangan vapispisi ni xa momal xa Kristin xil liling nenemien nae ihe tan tangan lipol ihusil nenemien na Kristin sav xil - Pol tehiteni xa momal xa Kristin xil liling nenemien nae ihe tan. Atou xil itel tiramue nae xil,✧ horamue xil itel tamexil e ninexil,✧ e slev xil itel masta nae xil mun.✧

Pol ien tehei tangan vapispisi ni xa itep iaxa neketen na Kristin xil mikila mei ixeh mu - Pol tepispisi ni xa Kristin xil livue xat xil ve vaeen te neketen ixoni ngan xa labe moletin xil te vaeen. E xil livae itel reitinen, momalen, tomat, nenesien, neketen, kilakilen xa Hi di miteh meulien e xil, e sepinien na Hi.

Vatit nenemien tei te uvei ak de Efeses 4:4-6

Io, xir xa raneket rabe tenben tei takes e Ninin Eo xa di iexir be tei takes. E, del nenemien xa be teviei, ranggur nenesien tei takes xa be reitin xa Hi tekes xir tangan riti vituei itela e ut nesao. Di ranggusil Suv tei takes xa be Kristo, di ranggusil xat pispisien tei takes, e labaptaes ni xir tangan ramos e neketen tei takes. Hi tei takes xa be Tame holesok xil vus. Xi be eilep mili holesok xil

✧ :: Efes 4:3 ✧ :: Efes 4:4 ✧ :: Efes 4:5 ✧ :: Efes 4:11-13 ✧ :: Efes 5:22-33 ✧ :: Efes 6:1-4 ✧ :: Efes 6:5-9

vus, di pol e meulien na moletin xil, e di meul e tine moletin xil.

?Naha iaxa di e uvei ak?

1. Pol pispisi ni xa Iesu Kristo iaxa be vatit lingxatien xil na Hi. (1:1–3:21)
2. Pol pispisi ni xa momal tangan Kristin xil mei lipol vituei e lipol vuol ni naha xa Hi ien bei tangan xil lipol ni. (4:1–6:24)

Sepkilaen na Pol usil uvei ak

¹ Inou Pol, xa Hi tehosei nou mei nabe eloheoh tei na Iesu Kristo, ieok bei tangan nasa sepinien navan vahat mi xamim, moletin xil na Hi xa mudi e taon te hal Efeses. Xamim di mupisen ni xa neketen namim nggeih e mubisti del xat Iesu Kristo. ☆

² Di nasis xa eheien hos e tomat na Hi Tamer xal Suv Iesu Kristo iti mi xamim.

Holesok xil xa Iesu tepol ni di misak ni xir rabe moletin xil xati na Hi

³ Ti risa memesien iha mi Hi xa be Tame Iesu Kristo, Suv nar. Ve vitueien nar del Iesu Kristo, Hi duxol xat xir del sanien xil vus xa nggo ut nesao. ☆

⁴ Tetiamu tamu nousav, melele xa Hi tenapeas ni ut etan ti mu, eheien na Hi teta ngamu e xir e xi tehosei xir tangan ihistin xir itel xat Kristo. Xi tepol ni temak tangan xir rihe moletin eo xil e meulien nar mun imal tevi pe meten. ☆

⁵ Hi teling xati nousav ngamu xa ileh rerat xir mei rihe horamue nan xil ixo holesok xil xa Iesu Kristo tepol ni. Hi tepol ni temak tehusil xat

☆ **1:1:** 1Kor 1:1; Kol 1:1 ☆ **1:3:** Efes 2:6 ☆ **1:4:** Sion 15:16; 17:24; 2Tes 2:13; Efes 5:27; Kol 1:22

nenemien nan vengan xa tehesi xi pupu tangan vapol ni. ✧

⁶ Reitin, Hi tehosei xir tangan ripet rat hisen ihe nesao ve eheien hos xa di pisen ni mi xir. Tave ti neta xa xir ratapol ni ti neta tangan ravur eheien hos nan, e tepisen ni mi xir ve holesok xil xa Natneli tepol ni, Natneli xa eheien nan di en. ✧

⁷ Hi di pisen ni xa eheien hos nan mahulong pupu nggo rin xa texal rat xir ra longpangasien ve tesaen nar texo re Natneli. Ve rin ak, xosali, xi di miketeh bos mi xir. ✧

⁸ Reitin, eheien hos nan xa di pisen ni mi xir eilep pupu. Hi be metisou e mikil holesok xil vus.

⁹ Ve rin ak, besi xi tangan vapisen kil nenemien xuxus nan mi xir xa teling xati tangan ipol ni ixo Iesu Kristo. ✧

¹⁰ Vengan Hi teling xati ngamu xa melele xa melengien teni ipin, xi ileh viton holesok xil vus xa di ut nesao e ut etan, e iling Kristo vari iaxa ihe vat teni. ✧

¹¹ Hi di misak ni holesok xil vus mei mistal nggusil lingxatien e nenemien nan. E nggusil nenemien nan, Hi tehosei xamem, Siu xil, mei mabisti del xat Kristo. E ve rin ak, di bosei xamim tangan mei muve moletin nan xil xati. ✧

¹² Ma pol ni mak tangan xamem xa mateneket e Kristo tetiamu, mukila mumeul tangan mupet rat his Hi ihe nesao.

¹³ E xamim mun, xa mutave Siu ti, mei mutelong longeongen hos te reitinen usil Kristo, e muteke reitin en. Mak, ma Hi teteh meulien e xamim e

✧ **1:5:** Sion 1:12 ✧ **1:6:** Mat 3:17; Kol 1:13 ✧ **1:7:** Kol 1:14,20; Efes 2:7 ✧ **1:9:** Rom 16:25; Efes 3:3,9 ✧ **1:10:** Kal 4:4; Kol 1:16,20 ✧ **1:11:** Rom 8:28-29

tesa Ninin Eo mi xamim xa xi tehit xati tangan isa ni. E Ninin Eo ak di pisen reitinen teni xa xamim mube nan. ✧

¹⁴ Reitin, melele xa Hi misa Ninin Eo ak mi xamim, di pisen ni xa ti imaen holesok xa di hen mi xir. E di pisen ni mun xa Hi nggal rat xir ngamu, e vatova, ileh xir ha riti vituei itela ixoni moletin nan xati xil. Mak, ma rimeul e riti itela tangan ripet rat hisen ihe nesao. ✧

Pol misis ve mol-Efeses xil tangan lipus kil holesok xil xa Hi di pol ni e rin nae

¹⁵ Inou natelong usil neketen namim e Suv Iesu e sexien te eheien xa di mupisen ni mi moletin na Hi xil. E ve holesok xil ak xa bos xa Hi di pol ni e rin namim, di nasis ve xamim. ✧

¹⁶ Reitin, e melele xil vus xa di nanem xat xamim e sisen xil navan, vehakut, dit nasa memesien ba mi Hi ve xamim.

¹⁷ Di nasis tangan Hi, Tame Iesu Kristo, Suv nar xa eilep pupu, ti isak ni xamim mupolu ni metisouen ixo Ninin Eo nan. E di nasis tangan Ninin Eo nan isak ni xamim mei mukil kuh xi ihe holu mu. ✧

¹⁸ Ma melele xa Hi isah nenemien namim xil, xamim mei mukil kuh hosien nan e holesok hos xil xa xi tehit xati tangan isa ni mi moletin nan xil e melele xa ti imei, e mukila munesi en vatel nenemien namim xa be teviei. ✧

¹⁹ E nasis mun tangan mukil kuh xeihen nan xa eilep pupu xa di pol dela e meulien nar xa di raneket e Kristo. ✧

✧ **1:13:** Kol 1:5; Efes 4:30 ✧ **1:14:** 2Kor 1:22; 5:5 ✧ **1:15:** Kol 1:4; 1:3; 1Tes 1:2 ✧ **1:17:** Kol 1:9-10; Aes 11:2 ✧ **1:18:** Efes 4:4; Kol 1:12 ✧ **1:19:** 2Kor 13:4; Kol 2:12

²⁰ E texo xeihen ak xa mahulong pupu, xi tepol ni Kristo temeaa rilomun ra maten, e telingi tetotan e rin metu e ut nesao. ✧

²¹ Mak, ma Kristo be eilep mak mu mili eilep savsav xil: ngan xil xa labe vat xil e ut nesao, e ngan xil mun xa labe vat xil e ut etan; suv toto xil xa lalaxat ut xa mahulong, e suv xil xa di lalaxat rute xil xa hokorong. Hisen be nesao pupu mili his eilep xil xa di latehur xeihen tetiamu, mu ngan xil mun xa langguri xosali. Hisen di mili his ngan xil mun xa ti lihur xeihen e melengien xil xa ti imei. ✧

²² Hi teling holesok xil vus te ut etan lateti pe he Kristo, e tesak ni mei be eilep te holesok xil e mei be vat na moletin nan xil xa labe Sias nan. ✧

²³ ✧ Sias ak be tenben. E Kristo di mise xat Sias nan del meulien e xeihen nan nggusil vatit sexien xa di mise xat holesok xil vus del meulien e xeihen nan.

2

Hi misa meulien hu mi xir xa rabisti del Iesu Kristo

¹ Tetiamu, Hi tepus xamim texoni ngan xa mulel tuei vengan xa mutelong ras raen e tesaen xil teti xat meulien namim. ✧

² E melele nen ak, mutehusil xat sexien tesa xil te ut etan e mutepol ni holesok xil xa Temat ien tehei. Xi be suv toto na ninin tesa xil xa di langga

✧ **1:20:** Sam 110:1; Mat 22:44; Mak 16:19; Pol 2:34; Hib 1:3; 8:1; 10:12; 12:2 ✧ **1:21:** Kol 1:16; 2:10 ✧ **1:22:** Sam 8:6; Rom 12:5; 1Kor 12:27; Efes 4:15; Kol 1:18 ✧ **1:23:** Efes 4:10; Kol 1:19 ✧ **2:1:** Efes 2:5; Kol 2:13

xolol e tilang hat, e xi di pol e meulien na ngan xil xa di latalong xat Hi ti. ✧

³ Xir vus ratexoni xil tang xa ekaten na Hi di xat xir, vengon xa ratehusil xat naha xa iexir tehei tangan vapol ni tenbexir valonge vahos ni. Reitin, tetiamu, ekaten na Hi teti mi xir vengon, melele xa latepes rohon ni xir tang, nenemien xil te tesaen teti ngamu e xir texoni moletin sav xil vus e ut etan, e momal tangan rihur pangasien ven. ✧

⁴ E vengon xa esaeen na Hi mahulong pupu e eheien nan mi xir be eilep mak mu, xi teteh meulien e xir.

⁵ Misak ni, melele xa di tamu ratelel pe meten ve longrasien nar, xi tesak ni xir ratehisti tetel Kristo. E pe met Hi, vengon xa ratehisti tetel Kristo, nggoni ngan xa tesak ni xir ratemeul tetela. Reitin, ve eheien hos nan kestang iaxa Hi teteh meulien e xamim. ✧

⁶ E vengon xa di rameul vituei dela, nggoni ngan taxa tesak ni xir ratemea rilomun ra maten tetela, xi teling xir di radotan del Iesu Kristo e ut nesao tangan ti rilaxat holesok xil vus itela. ✧

⁷ Hi tepol ni temak tangan, e melengien xil xa ti imei, ikila ipisen ni xa eheien hos nan mahulong pupu e di pol bos mi xir xa rabisti del xat Iesu Kristo. ✧

⁸ Io, texo eheien hos na Hi kestang, xi teteh meulien e xamim vengon xa di muling nenesien namim e Kristo. Mutahur meulien sal ti vaxo neta

✧ **2:2:** Kol 3:7; Taet 3:3; Sion 12:31; Efes 6:12; 5:6 ✧ **2:3:** Kol 3:6

✧ **2:5:** Efes 2:1; Kol 2:13; Luk 15:24,32; Rom 6:13; Pol 15:11; Efes 2:8

✧ **2:6:** Kol 2:12 ✧ **2:7:** Efes 1:7

tova xa xamim tang di mupol ni. E-e, meulien sal ak be sanien tei xa Hi vari iaxa di misa ni. ✧

⁹ Reitin, meulien ak tave huit polien na moletin ti tangan ti vasep koai ven.

¹⁰ Hi pol kuhi ni xir mei rabe neta hu rilomun mak vengan xa rabisti del Iesu Kristo. Hi pol ni mak tangan ti ripol ni polien hos nan xil xa teling xati tuei tangan ti ripol ni. ✧

Nggo Iesu Kristo, moletin xil vus lapin tang pe met Hi

¹¹ Bos xa xamim, mol-Efeses xil, munem xati xa, melele xa latepes xamim, mutnave Siu ti. E Siu xil latekes xamim ni 'ngan xil xa latave vexahu ti.' E di lasep usil vexahu xa moletin tang di pol ni del hen e rut tenbe moletin xil. ✧

¹² Munem pisi xa mutehe visi tetiamu, e melele xa mutnavisti ti mu tenatel Kristo. Vengan xa, e melele nen ak, xamim mutehe ngan halesav xil e mutnave moletin xil na Hi ti vengan xa mutnave hortan xati ti vatel mol-Isrel xil. Tesak ni, rin namim tehe tovuol e hitxatien te xeih xa Hi tepol ni tetel moletin nan xil. Xamim mutemeul muteti e ut etan ak, e neta tehe tovuol tangan muling nenesien namim vati en vengan xa mutnakil ti Hi. ✧

¹³ Reitin, tetiamu, xamim muteti sotin ra Hi e moletin nan xil. E taxeak, vengan xa mubisti del Iesu Kristo, Hi tesak ni xamim mumei sangas visali. Pol ni mak vengan xa muling nenesien

✧ **2:8:** Pol 15:11; Kal 2:16; Efes 2:5; Sion 4:10; Hib 6:4; Rom 2:28; 2Tim 1:9; Taet 3:5; 1Kor 1:29 ✧ **2:10:** Taet 2:14 ✧ **2:11:** Efes 5:8 ✧ **2:12:** Rom 9:4; Kol 1:21; 1Tes 4:13

namim di e Kristo xa temaen ren teleh ve rin nar.
 ☆

14 Re Iesu iaxa tekas moten metexir tangan vasak ni xir riti vituei e tomat e ti rinaketeh ti mun nasa mi xir. Io, tetiamu, texoni vloh tei xa eilep teta pas xamem, Siu xil, ra xamim xa mutave Siu ti. E maten na Iesu tehu lelen vloh ak tangan rakila mei rave vanut moletin tei takes. ☆

15 Melele xa Iesu temat, tesak ni rae xil na Siu xil mei labe neta sav tang, del holesok sav xil xa moletin xil di lapol pisi ni tangan mei lamal pe met Hi. E Iesu tehistin xi tetel tatit moletin lu tangan vapol ni tomat vatel xat xalu, e vasak ni xalu mei lalohe vanut moletin tei takes xa ihe neta hu. ☆

16 Texo maten nan e eivave, Iesu teserev kete-hen tesa nalu. Io, texo naha xa tepol ni e eivave, Iesu tehistin xalu mei lube vanut moletin tei takes e misak pilei rin nalu pe met Hi. ☆

17 Ma Kristo temei e tehithiten longeongen hos te tomat mi moletin xil vus: teha mi xamim xa mutave Siu ti xa muteti sotin ra Hi, e teha mi xamem mun, Siu xil xa mateti sangas visali. ☆

18 E nggo Kristo, xir vus, Siu xil e ngan xil xa latave Siu ti, rakila ramei pe valnao Hi Tamer vengon xa Ninin tei takes de xir vus. ☆

19 Mak, ma xamim xa mutave Siu ti, mutave ngan halesav ti mun. Taxeak, mudi e vatimol xati na Hi e mube hortan xati del moletin sav nan xil.
 ☆

20 Moletin nan xil langgoni nim tei xa xi di mikili ni. Eloheoh xil na Iesu Kristo e provet xil na Hi,

☆ **2:13:** Aes 57:19; Kol 1:20 ☆ **2:14:** Aes 9:6; 1Kor 12:13; Kal 3:28; Kol 2:14 ☆ **2:15:** 2Kor 5:17 ☆ **2:16:** Kol 1:20,22 ☆ **2:17:** Aes 57:19; 52:7; Sak 9:10 ☆ **2:18:** Rom 5:2; Efes 3:12 ☆ **2:19:** Efes 3:6; Hib 12:22-23

xil langgoni pos xil teni. E Iesu Kristo vari iaxa be seteman teni. ☆

²¹ Kristo iaxa di misuv xat nim ak e misak ni bisti kuhi. Xi pol ni mei be Nim Eo xa pipin tangan Hi mei ita kat en. ☆

²² ☆E xamim xa mubisti ngamu del Kristo, xi di pol ni xamim del moletin sav xil na Hi mei mube vanut moletin tei takes. Nggo xeihen na Ninin Eo, xamim mei munggoni Nim Eo xa Hi da en.

3

Pol misep usil polien nan del ngan xil xa latave Siu ti

¹ Ve holesok xil vus xa Hi di tepol ni e rin namim, inou di nasis ve xamim. E xosali, nade nim te xeih ve polien xa Iesu Kristo tesa ni minou tangan nihithiten longeongen hos mi xamim xa mutave Siu ti. ☆

² Nanemi xa xamim mutelongeong ni ngamu xa Hi tepisen eheien hos nan minou e suse xa tesa polien ak minou tangan nihit nihit mesen longeongen hos nan mi xamim. ☆

³ Xi tepisen nenemien xusus nan minou tangan nikila. Ngan ak be naha xa natetis usili vuteili ngamu e uvei ak. ☆

⁴ E vahit xamim mule usil naha xa natetisi, ma mukil kuh kilakilen xa natehuri usil nenemien xusus na Hi usil Kristo.

⁵ Tetiamu, Hi tenavit kil ti nenemien xusus ak mi moletin xil te ut etan. E taxeak, nggo Ninin nan,

☆ **2:20:** Rev 21:14; Mat 16:18; Aes 28:16; 1Pit 2:6 ☆ **2:21:** Efes 4:15-16; Kol 2:19; 1Kor 3:16; 2Kor 6:16 ☆ **2:22:** 1Pit 2:5 ☆ **3:1:** Efes 4:1; Plp 1:7,13; Flm 1:9 ☆ **3:2:** Kol 1:25 ☆ **3:3:** Efes 1:9-10; Kol 1:26

Hi pisen ni mi eloheoh eo xil na Iesu del provet nan xil te xosali ak tangan lakila.

⁶ Nenemien xuxus na Hi mak: nggo longeongen hos nan usil naha xa Iesu Kristo tepol ni, ngan xil xa latave Siu ti di lamos del Siu xil mei labe vanut moletin tei takes nggoni ngan xa labe tenben tei takes. Xil vus mei labe horamue xil xati na Hi e ti lileh holesok xil xa di e hen xa tehit xati tangan isa ni mi ngenen xil. ✧

⁷ E rin te longeongen hos ak, Hi tesak ni nou napol mini del xeihen nan tangan nihithiteni. Reitin, Hi tepisen eheien hos minou nggoni sanien tei nan minou melele xa tesak ni nou mei nabe moletin te polien nan. ✧

⁸ Neta sav xa inou nabe hokorong mu ni moletin sav xil vus na Hi, e ve eheien hos nan di e nou, xi temaen nou nanggur polien hos ak. Io, xi temaen nou tangan niha mi ngan xil xa latave Siu ti e nihithiten longeongen hos mi xil. Di nabit usil holesok xil vus xa bos pupu xa nggo visal Kristo xa moletin tovuol mikila vaxale. ✧

⁹ Hi tepeas ni holesok xil vus, e tepol ni nenenemien xuxus nan tetiamu nousav. E xi di maen nou tangan nihithiteni mi moletin xil vus mei lilong kila. ✧

¹⁰ Taxeak, Hi di pol nggo Sias nan tangan vapisen suse xil te metisouen e xeihen nan mi ninin tesa xil e vat nae xil xa langgur xeihen xa ladi e tilang hat. ✧

¹¹ Hi pol ni mak nggusil nenemien xa xi teling xati tetiamu nousav, xa mei testal tehe reitin texo

✧ **3:6:** Efes 2:13,18-19 ✧ **3:7:** Kol 1:23,25 ✧ **3:8:** 1Kor 15:9-10; Kal 1:16; Efes 1:7 ✧ **3:9:** Rom 16:25; Kol 1:26 ✧ **3:10:** 1Pit 1:12; Rom 11:33

Iesu Kristo, Suv nar.

¹² E vengan xa raling neketen nar e Iesu Kristo e rabisti dela, rakila ramei pe valnao Hi e ulixir nakan ni ekaten nan ti. ✧

¹³ Misak ni, di nasis tangan nenemien namim namot ti ve longpangasien xil xa di nangguri ve xamim e nim te xeih ak. Bos xa musep koai ven, vengan di nangguri tangan vatutou ni rin namim. ✧

Pol misis rilomun xa mol-Efeses xil lipus kil holesok xil xa bos xa Hi tepol ni e rin nae

¹⁴ Melele xa nanem usil holesok xil xa Hi Tamer tepol ni, di natingeiril e sisen pe meten.

¹⁵ Vengan xi be Tame ngan xil vus xa di laneket e langgur hisen: na ngan xil xa ladi e ut nesao, e na ngan xil xa ladi e ut etan.

¹⁶ Hi, holesok xil xa di lastal langgo en ve minehinen te xeihen nan labe holu xa labe holu pupu. E di nasisi tangan Ninin Eo nan isak ni tinemim ixeh mu ixo xeihen nan. ✧

¹⁷ Nasis tangan Kristo imeul e tinemim vengan xa muling neketen namim di en. E nasis mun tangan musak ni suse te eheien mei ihe vatite te meulien namim, e sexien namim xil vus ipisen ni. ✧

¹⁸ Imak, ma xamim e moletin sav xil mun na Hi likila likil kuhi xa eheien na Kristo eilep xa eilep pupu. ✧

✧ **3:12:** Rom 5:2; Hib 4:16; 10:19 ✧ **3:13:** Kol 1:24 ✧ **3:16:** Kol 1:11 ✧ **3:17:** Sion 14:23; Kol 1:23; 2:7 ✧ **3:18:** Kol 2:2

¹⁹ Reitin, neta sav xa eheien nan eilep pupu mili naha xa moletin xil lakila lanem usili, nasih Hi tenggan isak ni xamim mukila. Imak, ma nenemien e sexien xil na Hi mei ise xat meulien namim. ✧

²⁰ !Imak, ma ripet rat his Hi! Nggo xeihen xa di pol dela e meulien nar, xi mikila ipol ni holesok xil hao ili naha xa xir rakila ranem usili mu rasisi ven. ✧

²¹ Ti ripet rat hisen ihe nesao venggan xa xi be eilep, e di pol ni holesok xil xa tellep e Sias nggo Iesu Kristo. Xosali e melengien xil xa ti imei, moletin xil vus ti lipet rat hisen ihe nesao iha vuma ... navus ti. Reitin.

4

Selxatien tenggan Kristin xil ti lipol vituei itel sexien te eheien

¹ Hi tesak ni xamim mei mube vanut moletin hu tei takes nan. Misak ni, inou Pol xa nade nim te xeih venggan xa napol mi Suv Iesu, di nasel xat xamim nggeih tenggan musak ni meulien namim ipin ni ngan xil xa Hi tekes xil labé nan. ✧

² Vehakut, mupol ni nenemien namim ihe tan e sexien namim imerou tang. Mupol ihos mi xamim mun tang itel eheien e nenemien xa teviei. ✧

³ Ninin Eo tesak ni xamim mei mube vanut moletin tei takes ngamu. Misak ni, musak pisi e rin xil vus tenggan muti vituei e tomat. ✧

⁴ Io, xir xa raneket rabe tenben tei takes, e Ninin Eo xa de iexir be tei takes. E, del nenemien xa be

✧ **3:19:** Kol 2:10 ✧ **3:20:** Kol 1:29 ✧ **4:1:** Efes 3:1; Plp 1:7,13; Flm 1:1,9; Kol 1:10 ✧ **4:2:** Kol 3:12-13 ✧ **4:3:** Kol 3:14-15

teviei, ranggur nenesien tei takes xa be reitin xa Hi tekes xir tangan riti vituei itela e ut nesao. ✧

⁵ Di ranggusil Suv tei takes xa be Kristo, di ranggusil xat pispisien tei takes, e labaptaes ni xir tangan ramos e neketen tei takes. ✧

⁶ Hi tei takes xa be Tame holesok xil vus. Xi be eilep mili holesok xil vus, di pol e meulien na moletin xil, e di meul e tine moletin xil. ✧

⁷ E mi xir kekes, Kristo di miti sanien te xeihen tesav xil nggusil nenemien nan. ✧

⁸ Ngan ak nggoni sepinien xa de Vanuvei Eo xa bit,

*“Melele xa be nesao e von merereen nan,
xi diamu ni ngan xil xa tevae teli xil xa ladi pe
hen.*

*E mi moletin nan xil, xi misa sanien hos xil mi
xil.”* (Sam 68:18)✧

⁹ Melele xa sepinien ak biteni xa xi *“be nesao e von merereen nan”* di pisen ni xa, tetiamu, Kristo teta ngamu e ut etan. ✧

¹⁰ E xi xa tete ut etan, be xi vari tang iaxa be ut nesao e ba be von merereen xa mili ut sav xil te ut nesao tangan mei vahe eilep vali holesok xil vus.

¹¹ E Kristo tesa *“sanien hos xil”* mi moletin nan xil tangan rute mei lihe eloheoh xil, rute mei lihe provet xil te xosali, rute ha lisetu ni longeongen hos, e rute ha lilaxat kuh vanut Kristin xil e ti lipispisi kuhi mi xil. ✧

¹² Kristo tesa sanien hos xil mi moletin nan xil ak tangan vasak mesen Kristin xil vus mei lapol ni polien hos xil tangan vatutou ni mosav xil. Nggo

✧ 4:4: Rom 12:5; Efes 2:16; 2:18 ✧ 4:5: Sion 10:16; 1Kor 8:6

✧ 4:6: 1Kor 12:6 ✧ 4:7: Rom 12:3,6; 1Kor 12:11 ✧ 4:8: Kol

2:15 ✧ 4:9: Sion 3:13 ✧ 4:11: 1Kor 12:28

suse ak, ma Sias, xa be tenbe Kristo, mei ixeih mu e neketen. ✧

¹³ Imak, ma ngan xil te Sias limei vituei tangan likil Nat Hi e liling neketen nae en, mei limatu kuhi e neketen nae, e limeul e rin xil vus iha vuma ... mei limal tevi ixoni Kristo tang. ✧

¹⁴ Rinaxoni tutut horamue xil ti mun e neketen nar xa latemanon tangan lake reitin e pispisien sav xil vus xa di lamei. E rinaxoni bot tei ti xa di miloh xolol tang e melele xa votiang sav xil lamei e di labuhi. Ma, rinamaen moletin te luvosen xil ti linamei linaluvos xir natel sepinien nae xil xa mikas. ✧

¹⁵ E-e, namak ti. Xir risepin usil reitinen na Hi e ti rihithiteni itel sexien te eheien. Imak, ma mei rimatu kuhi e rin xil vus e mei rixonon Kristo xa be Vat te Sias nan. ✧

¹⁶ Xi di bistin moletin nan xil nggoni ngan xa labe rut tenben xil xa di labistin xil labe tei takes. E melele xa rut tenben xil ak di lapol ni polien xati nae xil, ma tenben ak mei ixeih e imatu kuhi. Misak ni, xosxa moletin xil te Sias ti lipol sen polien nae xil itel sexien te eheien, ma Sias mei ixeih mu e imatu kuhi.

Pol misel xat Kristin xil tangan listokovein meulien matu nae e lihur meulien hu xa Hi di misa ni mi xil

¹⁷ Vengan xa xamim mube rut tenbe xil te Sias na Iesu Kristo, ieok bei tangan nisel xat xamim itel xeihen xa Suv Iesu tesa ni minou. Nasel xat xamim tangan munahusil ti mun sexien na ngan

✧ **4:12:** 2Tim 3:17; 1Pit 2:5 ✧ **4:13:** Kol 1:28 ✧ **4:14:** 1Kor 14:20

✧ **4:15:** Efes 1:22; 5:23; Kol 1:18; 2:19

xil xa latakil ti Hi. Vengan nenemien nae bon, e di lanem usil holesok xil xa be neta sav tang. ✧

¹⁸ Ladi tamu e maluxoluken e lasakras lanem kil holesok xil na Hi. Xil ladi sotin ra meulien hu xa Hi di misa ni vengan xa vatixil nggeih e iexil ti tavei lakil suse nan. ✧

¹⁹ Melele xa di lapol ni tesaen, latave unoun ti ven. Xil latesa xil tangan lihusil sexien xil xa tenbexil tang iexil bei, di lapol ni holesok hao xa misa pupu, e iexil bei pupu tangan lixulehi ti lipol ni isa mak mu. ✧

²⁰ E ngan ak tave sexien xil ti xa mutepol ni melele xa latepispisi mi xamim usil Iesu Kristo.

²¹ Reitin li, latepispisi mi xamim usil reitinen na Iesu melele xa mutelong usili e mutevisti tetela.

²² Latepispisi mi xamim tangan mustokovein meulien matu namim del sexien tesa xil teni, ixoni ngan xa muso rat talmusu tei ba. Vengan, e melele nen ak, muteluvos xamim mun tang mutehit holesok xil xa tenbemim ien tehei tehos mak mu. E holesok xil ak di tepurun meulien namim tang. ✧

²³ Latepispisi mi xamim tangan mumaen Hi ihiles sexien te nenemien namim, e isak ni mei ihe neta hu. ✧

²⁴ E latepispisi mi xamim tangan muhur sexien hos xil te meulien hu namim ixoni ngan xa di musing ni eising hu tei xa bos xa bos. Misak ni, momal tevi xa sexien namim xil ti ipisen ni xa meulien hu xa Hi tesa ni mi xamim be eo e momal tevi, nggoni ngan xa xi vari be eo e momal tevi. ✧

✧ **4:17:** Rom 1:21 ✧ **4:18:** Efes 2:12; Kol 1:21; 1Pit 1:14 ✧ **4:19:** Kol 3:5 ✧ **4:22:** Kol 3:9; Kal 6:8 ✧ **4:23:** Rom 12:2 ✧ **4:24:** Kol 3:10; Sen 1:26

Pol misel xat Kristin xil tangan sexien nae xil ipisen ni xa langgur meulien hu

²⁵ Vengan xa ratehur meulien hu xa Hi tesa ni mi xir, rinaluvos ti mun. Bos xa holesok xil vus xa di rasep usili del tua nar xil e neketen ihe reitin. Ripol ni imak vengan xa xir vus rabe rut tenbexil te Sias tei takes. ✧

²⁶ Momal tangan iemim ikat e melele xa mupus moletin tei di pol misa, e muxuxou kuhi tangan ekaten namim nasak ni xamim ti munamot e tesaen. E xosxa iemim nggat mosav tei, e melele nen tak, itiamu ni melele xa eai inu, mutemanon ha mumal ni rin namim. ✧

²⁷ Mak, ma munasa mesal ti mi Temat tangan natiamu ni xamim munahusil suse nan te tesaen.

²⁸ Xosxa tei e xamim be moletin te kanen, ma istokovein sexien te kanen ak, e ha ipol itel hen xalu ihusil sexien hos tei. Imak, ma ikila isa tutouen mi ngan xil xa holesok nae tovuol. ✧

²⁹ Munaso ti sepinien xa misa, e musa kes ni sepinien hos te tutouen mi xil xa ipisen eheien hos na Hi. Imak, ma melele xa mupusi momal tangan mupol ni, musa sepinien hos xa ti isak ni ngan xil xa lalonge, nenemien nae mei ixeih mu. ✧

³⁰ Munapol ni sexien xil ti xa nasak ni Ninin Eo na Hi nalonge nasa. Vengan Hi tesa Ninin nan mi xamim tangan vapisen ni xa tesikoe xol xamim e texal rat xamim ngamu mube moletin nan xil e, e melele tei xa ti imei, ileh rerat xamim ra ut etan xa polu ni longpangasien. ✧

✧ **4:25:** Sak 8:16; Kol 3:8-9 ✧ **4:26:** Sam 4:4; Tem 1:19-20 ✧ **4:28:** 1Tes 4:11 ✧ **4:29:** Efes 5:4; Kol 3:8; 4:6 ✧ **4:30:** Aes 63:10; 1Tes 5:19; Efes 1:13-14

³¹ Ma mustokovein sexien tesa xil ak. Munanem ti nasa, iemim naat xamim ti, e munaso ti sepinien te xeih naha xat xamim mun tang. Munavae ti natel xamim, munaseputut ni xamim ti, e munapol ni ti holesok sav xil mi xamim natel nenemien xa misa. ✧

³² ✧ Momal xa mupol ihos e mupisen esaeen mi xamim mun tang. Muketeh ihos mun mi xamim ixoni ngan xa Hi di miketeh bos rilomun mi xamim ve holesok xil xa Kristo tepol ni.

5

Pol misel xat Kristin xil tangan linahusil ti mun sexien matu nae xil

¹ Vengan xa mube horamue xil xati na Hi xa eheien nan di e xamim, sexien namim ihusil xat sexien hos nan xil. ✧

² Mupisen eheien namim mi mosav xil ixo sexien xil vus namim. Reitin, mupol ni itel eheien ixoni ngan xa Kristo tepol ni melele xa temaen tasen ni meulien nan mi Hi tangan vamat vahinat xir. E Hi tehesi xi ve maten nan nggoni ngan xa, tetiamu, tehesi xi melele xa latehas sipsip tei tangan vahe sanien eo tei e rin na moletin xil. ✧

³ E vengan xa xamim mube moletin eo xil na Hi, sexien tesa xil ak ihe tovuol vari e xamim: munapat ti natel mosav xil xa mutateli ti vatela, munapol ni ti sexien tesa xil te suse, e munaso viton holesok namim xil ti nave holu. ✧

⁴ Munasuhol ti, munasep talang ti, e munaso sepinien sav xil ti xa misa. Vengan tamal ti tangan

✧ **4:31:** Kol 3:8 ✧ **4:32:** Kol 3:12-13; Mat 6:14; 18:22-35 ✧ **5:1:** Mat 5:48 ✧ **5:2:** Rom 14:15; Kal 2:20; Sam 40:6; Hib 10:10; Eks 29:18; Esek 20:41 ✧ **5:3:** Kol 3:5

moletin xil na Hi lasepin vamak. Ihos mak mu xa musa sepinien te memesien iha mi Hi ve holesok xil xa di pol ni e rin namim. ✧

⁵ Bos xa mukil kuhi xa ngan xil xa di lapol ni sexien tesa xil ak linava ti e rute xa Hi xal Iesu Kristo lube suv toto en e xi nahur ti neta xa bos xa da en. Io, ngan xil xa di lapat del moletin tei xa latateli ti vatela, e ngan xil xa di lapol ni sexien xil te suse, xil linava ti rute ak. E ngan xil mun xa di laso viton holesok nae tangan vahe holu linava ti en vengan xa sexien nae di pisen ni xa di lamot mi holesok nae xil nggoni ngan xa be hi nae. ✧

⁶ Munamaen moletin xil ti tangan mei linaluvos xamim linahit Hi nasa pangasien ti mi ngan xil xa di lapol ni hisit tesaen xil ak, vengan xa be reitin xa Hi ien nggat ngan xil xa di lalong ras raen e isa pangasien mi xil. ✧

⁷ Misak ni, munamos ti natel hisit moletin xa di lapol ni sexien xil ak.

⁸ Vengan, tetiamu, melele xa mutnakil ti mu Hi, xamim mun muteti e maluxoluken. E xosali, mubisti del Suv Iesu e mudi e miehen na Hi. Misak ni, sexien xil te meulien namim ti ipisen ni xa mube horamue nan xil. ✧

⁹ Vengan ngan xil xa ladi e miehen, sexien xil te meulien nae ipisen hosien, momalen, e reitinen.

¹⁰ Misak ni, musak pisi tangan mukil sexien eah xa isak ni Hi ihesi xi ven, e ti mupol ni. ✧

¹¹ Melele xa moletin sav xil di lapol ni sexien tesa xil te maluxoluken, rin namim ihe tovuol en,

✧ **5:4:** Efes 4:29; Kol 3:8 ✧ **5:5:** 1Kor 6:9-10; Kol 3:5 ✧ **5:6:** Kol 2:4,8; Rom 1:18; Kol 3:6 ✧ **5:8:** Efes 2:11,13; Kol 1:13; 1Pit 2:9; Luk 16:8; Sion 13:36 ✧ **5:10:** Rom 12:2

vengan xa neta ti xa bos nastal naxo en. Bos mak mu tangan muhit kila mi moletin xil xa hisit sexien xil ak tavos ti. ✧

¹² Vengan xa hisit sexien tesa xil ak xa ngan xil xa di lalong ras Hi di lapol xuxus ni, xir rinapol ni ti e rihe unoun tangan ti risep usili.

¹³ E melele xa miehen na Hi mei ileluv xati, ma ipisen kila tangan moletin xil vus ti lipus kila. ✧

¹⁴ Reitin, miehen di misak ni moletin xil lapus kil reitinen te holesok xil vus. Ngan ak nggoni kikeien tei nar xa bit,

“Xamim xa mupat, mutamea mulale.

Xamim xa mumat, mumeul rilomun ra maten.

Melele xa mudi e maluxoluken,

miehen na Kristo ileluv e xamim.”✧

¹⁵ Misak ni, mungguxou kuhi ve kakaoen te meulien namim. Munapol ni ti sexien xil naxoni ngan xa mube unu xil, e muhe metisou.

¹⁶ Reitin, mupol ihos e melele xil vus xa di mupus mesal tangan mupol ni. Vengan xa radi e melengien xil xa moletin xil di lapol misa vehakut.

✧

¹⁷ Munave unu ti, e mukil naha xa Hi ien bei tangan mupol ni, e ti mupol ni sung. ✧

¹⁸ Munatalang ni uaen ti, vengan melele xa mupolu ni uaen, musakras muvur xat sexien namim xil. E mupolu ni Ninin Eo tang. ✧

¹⁹ Vengan melele xa mupolu ni Ninin Eo mukila mupet rat his Suv Iesu melele xa mukikei vituei ni sam xil, sisien sav xil te neketen, e kikeien sav xil

✧ **5:11:** Rom 16:17; 2Tes 3:6; 2Sion 1:10-11 ✧ **5:13:** Sion 3:20-21

✧ **5:14:** Aes 26:19; 51:17; 52:1; 60:1; Rom 13:11 ✧ **5:16:** Kol 4:5;

Amos 5:13 ✧ **5:17:** Rom 12:2; Kol 1:9 ✧ **5:18:** Pro 23:31

xa Ninin Eo di misa ni mi xamim tangan mumesi ixo tinemim tevi. ✧

²⁰ Mukila mumes Hi Tamer vehakut ve holesok xil vus xa di pol ni e rin nar nggo Iesu Kristo, Suv nar. ✧

²¹ E mukila muling nenemien namim ihe etan tangan mupol ihusil nenemien na Kristin sav xil. Xosxa mupol ni imak, ma di mupisen ni xa di numerere ni Kristo. ✧

Pol misel xat Kristin xil tangan liti vituei e hosien

²² Atou xil, xamim ti mupol ni nenemien namim ihe etan tangan mupol ihusil nenemien na tiramue namim xil. Muhusil nenemien nae ixoni ngan xa di mupol ni mi Suv Iesu Kristo. ✧

²³ Vengan tiramue namim xil labe vat namim nggoni ngan xa Kristo be vat te Sias nan. Sias ak be tenben, e moletin xil xa labe nan xati ladi en. E xi di miteh meulien e xil vus. ✧

²⁴ E hisit sexien xa Kristin xil te Sias di laling nenemien nae be tan tangan lipol ihusil nenemien na Kristo, momal tangan atou xil mun ti liling nenemien nae ihe tan tangan lipol ihusil nenemien na tiramue nae xil.

²⁵ Tiramue xil, eheien namim iti mi atou namim xil. Eheien namim ixoni eheien xa Kristo tepisen ni mi Sias nan melele xa tesa xoteh meulien nan tangan vahinati. ✧

²⁶ ✧ Iesu temat ve moletin xil te Sias nan tangan vapol ni xil mei limese tevi. Xi temotin xil texo oei te baptaes e texo sepinien nan xil. ✧

✧ **5:19:** Kol 3:16; Sam 33:2,3 ✧ **5:20:** Kol 3:17 ✧ **5:21:** 1Pit 5:5
 ✧ **5:22:** Sen 3:16; Kol 3:18; 1Pit 3:1 ✧ **5:23:** 1Kor 11:3 ✧ **5:25:**
 Kol 3:19; 1Pit 3:7; Efes 1:22; Kol 1:18 ✧ **5:26:** Taet 3:5 ✧ **5:26:**
 Hib 10:10,14; 13:12

²⁷ Temotin ni tangan vasak ni Sias nan mei vamese tevi e vaminehin, e vasak ni tesaen e holesok xil xa be muis vahe tovuol en. Ien bei vapol ni vamak tangan vasak ni vamei vamese tevi pe meten. ☆

²⁸ E vatit sexien ak, tiramue tei ipisen eheien mi atou nan e ilaxat kuhi ixoni ngan xa ien bei tasen ni tenben e di milaxat kuhi. Vengan xa tiramue xa di ien bei atou nan, nggoni ngan xa di ien bei xi tasen.

²⁹ Moletin tovuol xa ien vat tenben xati, vengan xi di misa anien mini e di misikoe xol kuhi. E Kristo mun di pol ni hisit sexien xil ak mi Sias nan

³⁰ vengan xa xir rabe rut tenben xil. ☆

³¹ Vanuvei Eo na Hi di misep usili melele xa bit, *“Ve rin ak, tiramue imea reling tamen xal ninen, e ihisti itel atou nan, e xalu mei lalihe tei takes.”* (*Sen 2:24*) ☆

³² Vatit nenemien tei di minggus e sepinien ak, vengan xa di misepin mun usil vitueien na Kristo xal Sias nan. ☆

³³ E, e rin namim tiramue xil, iemim ihei atou namim xil ixoni ngan xa iemim bei tenbemim tang. E xamim, atou xil, ti muling nenemien namim ihe tan e mupol ihusil nenemien na tiramue namim xil.

6

Selxatien ba mi horamue xil del tamexil e ninexil

☆ **5:27:** 2Kor 11:2; Kol 1:22 ☆ **5:30:** Rom 12:5; 1Kor 6:15; 12:27; Efes 1:22-23; Kol 1:18 ☆ **5:31:** Mat 19:5 ☆ **5:32:** Rev 19:7

¹ Xamim, horamue xil xa di mubisti del Kristo, mulong xat tamemim e ninemim xil vengan xa ngan ak momal. ☆

² Ngan ak be rae xa Hi tesa ni melele xa tehit, *“Mumerere ni tamemim e ninemim xil.”* (Eks 20:12) ☆ E nggo rae xil, ngan ak vari Hi tesa kokot ni rae ak vari tetel hitxatien tei tehit,

³ *“Imak, ma mupus hosien e meulien namim ihe teviei e ut etan.”* (Eks 20:12)

⁴ E xamim, tata xil, munapol ni ti naxeih pupu mi horamue namim xil tangan iexil naxat xamim ti. E mupispisi kuhi mi xil tangan likil holesok xil na Suv Iesu e itep likila lixuxou kuhi ve sexien nae xil. ☆

Selxatien ba mi slev xil del masta nae xil

⁵ Xamim slev xil, ti mulong xat masta namim xil e ut etan ak itel merereen, e mupol mi xil itel nenemien hos. Mulong xat xil e hisit sexien taxa di mulong xat Iesu Kristo nggo en. ☆

⁶ Munalong xat xil ti kestang e melele xa di lapus xamim tangan lavesi xil ve xamim. E ihos mak mu tangan mulong xat xil vengan xa mube slev xil na Kristo, e mubesi xamim tangan ti mupol ni naha xa Hi ien bei xamim tangan mupol ni.

⁷ Reitin, mupol mi masta namim xil itel nene-mien hos ixoni ngan xa di mupol mi Suv Iesu, e nave moletin xil ti kestang.

⁸ Ti mupol ni ihos imak vengan rakila xa Suv Iesu isa kekes ni huit polien ihusil naha xa xir

☆ **6:1:** Kol 3:20 ☆ **6:2:** Dut 5:16; Mat 15:4 ☆ **6:4:** Kol 3:21; Dut 6:7,20-25; Sam 78:4; Pro 19:18; 22:6 ☆ **6:5:** Kol 3:22-23; Taet 2:9-10

di rapol ni, tave ti neta xosxa xir rabe slev mu rameluv tang. ✧

⁹ E ihusil vatit sexien xil ak, xamim masta xil, mupol ihos mi slev namim xil. Munaso sepinien te xeih ti naha xat xil munahit ti musa pangasien mi xil xosxa linapol ti nahusil nenemien namim. Munem xati xa Masta nae xa de ut nesao be Masta namim mun. E melele xa ilepis rin namim xil vus, napus ti moletin nave eilep nali ngan tesav. Ipol ni ipin tang mi xamim vus. ✧

Selxatien mi Kristin xil tangan lisoh ixeh e neketen nae

¹⁰ Tangan nisep kor mi xamim, ieok bei nasel xat xamim tangan muxeih mu e neketen namim. Xeihen namim nggo Suv Iesu vari vengan xa di mubisti dela.

¹¹ Muvue xat xamim ve vaeen te neketen ixoni moletin te vaeen tei xa di bue xat xi. Reitin, musing ni eising xil te vaeen xa Hi di misa ni mi xamim tangan mukila musoh ixeh melele xa Temat mei isak pisi tangan valuvos xamim mumot. ✧

¹² Vengan, e vaeen te neketen xa radi en, elu nar xil tave moletin xil te ut etan ti. E elu nar xil labe Temat e ninin tesa nan xil xa di langga xolol e tilang hat. Xil iaxa di langgur xeihen e ut etan ak e di lasak tangan lapol ni moletin xil lamot e tesaen, e lapol ni nenemien na moletin xil ak mei vamaLuxoluk. ✧

¹³ Misak ni, musing kuhi ni eising xil vus te vaeen xa Hi di misa ni. Imak, ma mukila musoh

✧ **6:8:** 2Kor 5:10; Kol 3:24-25 ✧ **6:9:** Kol 4:1; Dut 10:17; 2Kron 19:7; Pol 10:34; Kol 3:25 ✧ **6:11:** Rom 13:12; 2Kor 10:4 ✧ **6:12:** Sion 14:30; Efes 2:2; 1Pit 5:8-9

ixeih e melengien xil vus xa Temat e ninin tesa nan xil mei ti lisak purun xamim. E melele xa muvae itel xil iha vuma ... ivus, xamim musoh ixeih tamu.

¹⁴ Misak ni, muvue xat kuh xamim itel eising te vaeen xil xa Hi di misa ni. Mukil kuh reitinen na Hi xa mutehuri ngamu. Reitinen ak mei ixoni atuatu namim xa ihur xat xamim. Munesi xa Hi isak ni xamim mei mumal pe meten, vengan xa imak, ma momalen nan isikoe xol meulien namim. Momalen ak mei ixoni eising te xeih xa di misikoe xol valhasemim. ✧

¹⁵ Muling neketen namim e longeongen hos xa di misak ni xamim mudi e tomat del Hi. Imak, ma musoh ixeih mu e neketen namim. Longeongen hos ak mei ixoni but tei te xeih xa ivue xat xamim tangan musoh ixeih mu e munamot ti. ✧

¹⁶ Itel holesok xil ak, mupol ni neketen namim e Iesu Kristo ixeih mu. Neketen ak mei ixoni eivae tei xa isikoe xol xamim ra tovasing xil vus na Temat xa misa pupu tangan linamei ti e meulien namim. ✧

¹⁷ Mukil kuhi xa Hi teteh meulien e xamim ngamu. Misak ni, Temat misakras vasak ni nenemien namim ti vamot. Kilakilen ak isikoe xol nenemien namim ixoni eising te xeih tei xa di misikoe xol vatumim. Mukil kuh sepinien na Hi xa Ninin Eo di misa ni mi xamim tangan mukila muhithiteni vehakut. Sepinien na Hi ak mei ixoni tiei te vaeen namim. ✧

¹⁸ E melele xa di musing mak, ma vehakut, ti musis mi Hi ihusil naha xa Ninin Eo di pisen ni mi

✧ **6:14:** Aes 11:5; Luk 12:35; 1Pit 1:13; Aes 59:17; 1Tes 5:8 ✧ **6:15:** Aes 52:7; Neham 1:15; Rom 10:15 ✧ **6:16:** Sam 7:13 ✧ **6:17:** Aes 59:17; 1Tes 5:8; Aes 11:4; 49:2; Hos 6:5; Hib 4:12

xamim. E ti musis mun tangan Hi isa tutouen mi xamim. E melele xa musis, vemim navuol ni ti, e munaling ti sisen namim ve moletin savsav xil na Hi. ✧

¹⁹ Musis ve inou mun tangan nikila nisepin kuhi ni sepinien eah xa Hi isa ni minou. Ieok bei tangan nihit kil koute te nenemien xuxus te longeongen hos nan, e uluk nakan ti. ✧

²⁰ Vengan xa inou nabe eloheoh tei tangan ha nihithiten longeongen hos ak na Hi. E ve rin ak, xil labar xat inou ni sen xil te xeih. Musis ve inou tangan nikila nihithiteni ixoni ngan xa momal tangan nipol ni, e uluk nakan ti. ✧

Sepinien kor

²¹ Tangan mukil kuh naha xa testal minou e holesok xil xa di napol ni, di nasil Tikikas bat tangan ihit mesen ni mi xamim. Xi be tuxoli hos tei xa di nggusil kuh Suv Iesu. ✧

²² Reitin, di nasila bat mi xamim tangan mukil kuh rin namem, e tangan ipet rat nenemien namim.

²³ Nasis xa tomat na Hi iti mi xamim vus xa di muneket. E nasis tangan Hi isak ni eheien namim mei ihe mahulong mu, e neketen namim e Iesu Kristo mei ixeh mu.

²⁴ E nasis tangan Hi ipisen eheien hos nan mi xamim vus xa di mupisen ni xa neta tovuol xa mikila vahiles eheien namim ra Iesu Kristo, Suv nar. ✧

✧ **6:18:** Luk 18:1; Kol 4:2-3; 1Tes 5:17 ✧ **6:19:** Pol 4:29; Kol 4:3; 2Tes 3:1 ✧ **6:20:** 2Kor 5:20; Flm 1:9; Kol 4:4 ✧ **6:21:** Pol 20:4; Kol 4:7-8; 2Tim 4:12; Taet 3:12 ✧ **6:24:** 1Pit 1:8

**Vanuvei Eo e sepinien Vatlongos na
mol-Vatimol xil niutestamen e rute te
oltestamen**
**Portions of the Holy Bible in the Southeast Ambrym
Language of Vanuatu**
**Des portions de la Sainte Bible dans le Sud-Est
Ambrym Langue de Vanuatu**

copyright © 2015 Wycliffe Bible Translators, Inc.

Language: Southeast Ambrym (Ambrym, Southeast)

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-06

PDF generated using Haiola and XeLaTeX on 18 Apr 2025 from source files dated 31 Aug 2023

d6322831-f65b-57c1-8673-8099ea7771d7